

Uunga siunnersuut: Aatsitassat pillugit ingerlatallu tamatumunnga pingaarutillit pillugit Inatsisartut inatsisaata (aatsitassanut ikummatissanullu inatsit) allanngortinneqarnissaa pillugu Inatsisartut inatsisaat nr. xx, xx. xxx 2019-imeersoq

Akissuteqaat

(Aatsitassanut Suliffeqarnermullu Naalakkersuisoq)

Aappassaanneerpeqarnera

Naalakkersuisut sinnerlugit Inuussutissarsiornermut Aatsitassanullu Ataatsimiititaliaq inatsisissatut siunnersuutip suliarineqarneranut atatillugu sukumiisumik suliarinninneranut qutsavigaara.

Ataatsimiititaliaq isumaqatigiittoq siunnersuummut tapersiisoq, Naalakkersuisut nuannaarutigalugu maluginiarpaat.

Aammattaq Naalakkersuisut maluginiarpaat, aatsitassanik piiaanermik suliassanut ataasiakkaanut atatillugu inuiaqatigiit soqutigisaannik Namminersorlutik Oqartussat isumaginninnerannut atugassanik, paassitutissanut tunngaviusunik naleqquttunik naammattunillu, qulakkeerisarnissaq aallunneqaannassasoq, ataatsimiititaliap kaammattuutigigaa.

Naalakkersuisut ataatsimiititaliap isummorsornera isumaqatigaat. Aningaasaqarnikkut pissarsiaqarnissamut tunngatillugu aammalu inuiaqatigiit ineriartornerat ataatsimut isigalugu, Kalaallit Nunaanni aatsitassarsiorluni ingerlataqarneq inuiaqatigiinnut sapinngisamik annertunerpaamik iluaqutaatinneqarnissaa pingaaruteqartorujussuuvoq, ilanngullugit suliffisaqartitsinerulernissaq aammalu nunaqavissunik sulisussanik piginnaanngorsaaneq.

Taamaattumik ilaatigut naatsorsuinerit suliassat inuiaqatigiinni piujuartussamik sunnuteqarnissaannik nalilersuinermut tunngavigineqartartut piumasarnerat Naalakkersuisut ingerlatiinnassavaat, aammattaarli uppersaatit inuiaqatigiinni piujuartussamik sunnuteqartitsinissaq pillugu isumaqatigiissuteqarnissamut pisariaqartut aamma piimaannassallugit.

Naalakkersuisut aatsitassarsiorfinnut inatsisissamik nutaamik suliaqarnermut atatillugu suliffissuit oqaloqatigisarnerat aallarnissavaat, tassani suliap ingerlanerata killiffiini assigiinngitsuni suliap ingerlaneri aammalu uppersaatit suut suliarineqartassanersut paasinarsisineqassalluni.

Taamaattumik Naalakkersuisut nuannaarutigalugu Inuussutissarsiornermut Aatsitassanullu Ataatsimiititaliap kaammattuineri malissavaat.